

Бямба гарагийн өглөөний хуралдаан  
2011 оны 4-р сарын 2

Бид Чуулгандаа дахин цуглалаа

Ерөнхийлөгч Томас С.Монсон

Та нарын итгэл болоод сайн мэдээнд үнэнч байдагт тань мөн бие биедээ үзүүлдэг хайр, үйлчлэлд тань талархал илэрхийлье.

Бид энэ барилгыг барихаар төлөвлөж байхдаа үүнийг хэзээ ч дүүргэж чадахгүй гэж бодож билээ. Харин одоо хар.

Хайрт ах эгч нар аа, Есүс Христийн Хожмын Үеийн Гэгээнтнүүдийн Сүмийн жил тутмын 181-р ерөнхий чуулганыг эхлэн та бид дахин хамтдаа байгаа нь ямар сайхан хэрэг вэ.

Олон үүрэг хариуцлагаа гүйцэтгэн завгүй байснаас өнгөрсөн зургаан сар нүд эрмэх зуур өнгөрсөн мэт санагдаж байна. Энэ хугацаан дахь хамгийн агуу адислалуудын нэг нь ойролцоогоор 2 жилийн турш их засвар хийсэн Хавайн Лайе дахь гайхамшигтай Ариун Сүмийг дахин онцгойлон адисалсан үйл явдал байлаа. Би Ерөнхийлөгч Хенри Б.Айринг болон Айринг эгч, Ахлагч Квинтен Л.Кук болон Кук эгч, Ахлагч Виллям Р.Уокер болон Уокер эгч нартай хамт явсан юм.

Арваннэгдүгээр сард болсон дахин онцгойлон адислалтын өмнөх өдөр 2000 залуус Хавай дахь Бригам Янг Их Сургуулийн Каннон Үйл ажиллагааны төвийг дүүргэж, бидэнд зориулан тоглолт хийснийг бид үзсэн. Тэдний хөтөлбөр “Цуглах газар” гэсэн нэртэй байсан бөгөөд тэд орон нутгийнхаа сүмийн түүх болон ариун сүмийн түүхэн дэх онцгой үйл явдлуудыг урлагийн чадварлаг тоглолтоор үзүүлсэн. Үнэхээр гайхамшигтай үдэш байлаа.

Дараагийнх нь өдөр ариун сүмийг гурван удаагийн цуглаанаар дахин онцгойлон адисалсан нь сүнслэг байдлын охь манлай болсон юм. Их Эзэний Ариун Сүнснийг бид агуу ихээр мэдэрч билээ.

Бид ариун сүмүүдийг барьсаар байна. Өнөө өглөө надад ирэх сар, жилүүдэд баригдах гурван ариун сүмийг зарлах онцгой боломж олдсон юм. Тэдгээр ариун сүмүүд нь Колорадо мужийн Форт Коллинс, Айдахо мужийн Меридиан, Канадын Манитоба мужийн Виннипегт тус тус баригдах гэж байна. Эдгээр нь баригдах газар бүрийнхээ гишүүдэд адислал байх болно.

Жил бүр Ариун сүмүүдэд сая сая ёслолыг гүйцэтгэдэг. Зөвхөн өөрсдийнхөө төлөө төдийгүй өөрсдийнхөө төлөө ариун сүмийн ёслолуудыг хийж чадахгүй нас барсан хайртай хүмүүсийнхээ төлөө ёслолуудыг гүйцэтгэхээ итгэлтэйгээр үргэлжлүүлцгээе.

Сүм байгалийн гамшиг сүйрлийн үеэр хүмүүнлэгийн тусламжаа үзүүлсээр байна. Саяхан болсон гамшигт газар хөдлөлт, цунами болон үүнээс үүдсэн атомын

цахилгаан станцад гарсан цөмийн бэрхшээлтэй үед бид Япон улсад сэтгэл санааны дэмжлэг, материаллаг тусламжаа үзүүлээд байна. Бид хүнс, ус, хөнжил, цагаан хэрэглэл, ариун цэврийн багц, хувцас болон шатахуун зэрэг 70 гаруй тонн хангамжийн барааг хүргүүлээд байна. Залуу гишүүд маань интернет, мэдээллийн болон орчин үеийн харилцаа холбооны төхөөрөмжийг ашиглан олдохгүй байгаа гишүүдийг олоход нь сайн дураараа тусалж байна. Гишүүд машинаар очиход хэцүү газруудад моторт дугуйгаар тусламжийг хүргэж байна. Токио, Нагоя, Осака дахь тойрог, гадсууд ариун цэврийн болон цэвэрлэгээний материалуудыг цуглуулан бэлтгэх үйлчлэлийн үйл ажиллагааг зохион байгуулсан. Одоогийн байдлаар 4000 гаруй сайн дурынхан 40,000 гаруй цагийг үйлчлэлд зориулаад байна. Бид Япон болон шаардлагатай бусад бүсүүдэд цаашид тусалсаар байх болно.

Ах эгч нар аа, та нарын итгэл болоод сайн мэдээнд үнэнч байдгийн тань төлөө, бусдад үзүүлдэг та нарын хайр халамж болон тойрог, салбар, гадас дүүргүүддээ хийдэг та бүхний үйлчлэлийн төлөө бид талархаж байна. Мөн аравны нэг болон мацгийн өргөлөө итгэлтэйгээр төлж, Сүмийн санд өгөөмрөөр хандив өргөдөгт тань би та бүхэнд талархлаа илэрхийлж байна.

2010 оны сүүлчээр дэлхий даяар 340 номлолд 52,225 номлогч үйлчилж байлаа. Номлолын ажил нь хаант улсын амьдралын эх булаг юм. Боломжтой бол Номлогчийн Ерөнхий Санд хандив өргөхийг би санал болгож байна.

Ах эгч нар аа, эдүгээ бид өнөөдөр болон маргааш бидэнд хандсан захиасуудыг сонсохоор сэтгэл догдолж байна. Бидэнд хандан үг хэлэх эдгээр хүмүүс тэнгэрийн тусламж, удирдамжтайгаар захиасуудаа бэлтгэсэн юм. Бид тэднийг сонсохдоо Их Эзэний Ариун Сүнсээр дүүрч, өсч хөгжин, урам зориг нэмэх болтугай хэмээн би залбирч байна. Есүс Христийн нэрээр, амен.

Лиахона

2011 оны 5-р сар